

## SAMÞYKKT

### um meðhöndlun úrgangs í Fjarðabyggð.

#### 1. gr.

##### *Almenn ákvæði.*

Samþykkt þessi gildir fyrir meðhöndlun úrgangs, þ.m.t. hirðu, söfnun og förgun úrgangs, í sveitarfélaginu Fjarðabyggð.

Meðhöndlun úrgangs í Fjarðabyggð skal vera samkvæmt ákvæðum samþykktar þessarar, laga nr. 55/2003, um meðhöndlun úrgangs, og reglugerðar nr. 737/2003, um meðhöndlun úrgangs.

Meðhöndlun úrgangs felur í sér söfnun, geymslu, böggun, flokkun, flutning, endurnotkun, endurnýtingu, pökkun og förgun úrgangs, þ.m.t. eftirlit með slíkri starfsemi og umsjón með förgunarstöðum eftir að þeim hefur verið lokað.

Framkvæmdasvið fyrir hönd bæjarstjórnar ber ábyrgð á úrgangsmálum Fjarðabyggðar og samskiptum við þá aðila sem þeim viðfangsefnum tengjast.

Bæjarstjórn er heimilt að fela öðrum framkvæmd söfnunar, rekstur söfnunarstöðva og móttökustöðvar og flokkun og förgun úrgangs. Hver sá sem tekur verkefnið að sér skal hafa starfsleyfi frá heilbrigðisnefnd Austurlands eða Umhverfisstofnun eftir því sem við á.

Framkvæmdasvið, í samráði við heilbrigðisnefnd Austurlands og framkvæmdaraðila/verktaka, ber ábyrgð á að íbúar fái fræðslu um flokkun og aðra meðferð úrgangs, móttöku hans og förgun.

Heilbrigðisnefnd Austurlands hefur eftirlit með að farið sé að samþykkt þessari.

Óheimilt er að skilja eftir eða geyma rusl, garðaúrgang eða annan úrgang á víðavangi, götum, gangstígum og fjörum í Fjarðabyggð. Sama á við númerslausar bifreiðar, bílflök, vélar og sambærilega hluti.

Íbúar, stofnanir og fyrirtæki skulu leitast við að draga úr myndun úrgangs eftir föngum.

#### 2. gr.

##### *Markmið.*

Landsáætlun um meðhöndlun úrgangs er lögð til grundvallar samþykkt þessari.

Markmið samþykktarinnar er:

- a. að lágmarka það úrgangsmagn sem fer til förgunar með því að auka endurvinnslu og endurnýtingu úrgangs,
- b. að lágmarka kostnað samfélagsins við meðhöndlun úrgangs,
- c. að kostnaður vegna úrgangs greiðist af þeim sem úrganginum veldur.

#### 3. gr.

##### *Söfnun á heimilisúrgangi.*

Með heimilisúrgangi er átt við úrgang frá heimilum, t.d. matarleifar, pappír, pappa, plast, garðaúrgang, gler, timbur, málma og sams konar leifar frá rekstraraðilum o.þ.h.

Eigna-, skipulags- og umhverfisnefnd, í samráði við heilbrigðisnefnd Austurlands og framkvæmdaraðila/verktaka, birtir yfirlit um hversu oft sorphreinsun fer fram.

Húsráðendum, hvort heldur sem er í íbúðarhúsnæði eða atvinnuhúsnæði, er skylt að nota þau ílát og þær aðferðir sem framkvæmdasvið ákveður en Fjarðabyggð útvegar sorphlát fyrir almennan og flokkaðan heimilisúrgang til notkunar við íbúðarhúsnæði og undir kaffistofuúrgang við fyrirtæki.

Gæta skal þess að fylla ekki sorphlátin meira en svo að auðveldlega megi loka þeim. Húsráðandi getur beðið um að ílátum sé fjölgað og greiðir þá aukagjald sem af fjölgun hlýst.

Í dreifbýli er heimilt í samráði við heilbrigðisnefnd Austurlands að setja upp sorphlát í alfaraleið í stað þess að sækja heimilisúrgang á hvert heimili. Staðsetning sorphláts skal vera þannig að aðgengi að því sé gott. Í ílátin má eingöngu setja heimilisúrgang.

## 4. gr.

*Rekstrarúrgangur.*

Fyrirtæki og stofnanir skulu sjálf sjá um að koma rekstrarúrgangi sínum í farveg. Þeim er skylt að flokka úrgang sem til fellur vegna starfseminnar í samræmi við reglur Fjarðabyggðar. Frágangur og umgengni um sorpílát, svo og flutningur á úrgangi frá fyrirtækjum skal vera í samræmi við fyrirmæli heilbrigðisnefndar og samkvæmt reglugerð nr. 737/2003, um meðhöndlun úrgangs. Staðsetning sorpgáma vegna rekstrarúrgangs skal vera í samræmi við ákvarðanir bæjarstjórnar þar um, eða ákvæði deiliskipulags.

## 5. gr.

*Flokkun úrgangs.*

Úrgang sem fellur til skal flokka þannig að unnt sé að endurnota, endurvinna og endurnýta sem mest og lágmarka magn úrgangs sem fer til urðunar.

Í sorpílát fyrir heimilisúrgang má aðeins setja þann úrgang sem fellur daglega til við venjulegt heimilishald, í samræmi við nánari fyrirmæli sem kunna að verða sett um flokkun úrgangs.

Óheimilt er að láta garðaúrgang, jarðvegsefni og brotajám í sorpílát og gáma.

Jarðvegsefnum, þ.m.t. grjóti eða múrbroti, skal komið á sérmerкта losunarstaði.

Spilliefnum, lyfjum og öðrum hættulegum úrgangi skal skilað á viðurkennda móttökustaði.

Timbur, brotamálm, raf- og rafeindatæki og annan grófan úrgang er óheimilt að setja í sorpílát fyrir blandaðan heimilisúrgang. Slikum úrgangi skal skilað til söfnunarstöðvar eða móttökustöðvar eða til brotamálmsfyrirtækja sem hafa starfsleyfi til móttöku á brotamálmi.

Glerbrotum og öðrum oddhvössum hlutum, sem hætta er á að skaði þá sem meðhöndla úrgang eða sorpílát, skal pakkað inn eða gengið frá þeim á annan tryggilegan hátt. Æskilegt er að þeim sé skilað inn til móttöku- og flokkunarstöðvar.

## 6. gr.

*Sorpgeymslur og -ilát.*

Ganga skal þannig frá sorpílátum og sorpgeymslum að þær valdi ekki óþrifum eða óþægindum. Húsráðendur fá afhend söfnunartilát frá Fjarðabyggð eða sorphirðuverktaka og eru ábyrgir fyrir tunnunum. Halda skal þeim við eftir þörfum og þau hreinsuð reglulega. Húsráðandi skal greiða fyrir nýja tunnu samkvæmt gjaldskrá ef tunna hefur skemmst vegna vanrækslu húsráðanda.

Sorpgeymslu má eingöngu nota til geymslu úrgangs. Sorpgeymslur skulu vera á jarðhæð og standa sem næst aðkomu að lóð. Halda skal greiðfærri leið að sorpgeymslum og sorpílátum og hreinsa burt snjó á vetrum. Þegar hundur er tjóðraður á lóð eða laus á lóð innan hundheldrar girðingar skal tryggja að komast megi óhindrað að sorpílátum til losunar. Að öðru leyti er vísað til byggingarreglugerðar nr. 112/2012 og reglugerðar nr. 737/2003, um meðhöndlun úrgangs.

## 7. gr.

*Söfnunarstöðvar og móttökustöð.*

Í þéttbýliskjörnum eru söfnunarstöðvar fyrir flokkaðan úrgang. Minni þéttbýliskjarnar og nágrennar geta sameinast um söfnunarstöð. Á söfnunarstöðvum skal tekið á móti flokkuðum úrgangi frá heimilum og minni fyrirtækjum samkvæmt gjaldskrá Fjarðabyggðar hverju sinni.

Móttökustöð Fjarðabyggðar er á Reyðarfirði og þar skal tekið á móti flokkuðum úrgangi frá heimilum og fyrirtækjum samkvæmt gjaldskrá Fjarðabyggðar hverju sinni.

Óheimilt er að losa annan úrgang á söfnunar- og móttökustöðvum en þá flokka sem tilgreindir eru með merkingum á hverri stöð.

Garðaúrgangi og jarðvegsefni, þ.m.t. grjóti og múrbroti, skal komið á sérmerktan losunarstað.

## 8. gr.

*Gjaldtaka.*

Fjarðabyggð innheimtir gjald fyrir förgun úrgangs í samræmi við 1. mgr. 23. gr. laga nr. 55/2003, um meðhöndlun úrgangs. Þá er sveitarfélaginu heimilt að innheimta sorphirðugjald fyrir alla aðra meðhöndlun úrgangs og tengda starfsemi í samræmi við 2. mgr. 23. gr. laganna.

Gjöldin skulu ákvörðuð og innheimt samkvæmt gjaldskrá sem sett er samkvæmt 23. gr. laga nr. 55/2003, um meðhöndlun úrgangs, og að fenginni umsögn heilbrigðisnefndar, sbr. einnig 59. gr. laga nr. 7/1998, um hollustuhætti og mengunarvarnir. Sveitarfélagið skal láta birta gjaldskrána í B-deild Stjórnartíðinda. Í gjaldskránni skal vísa til þessarar samþykktar.

Gjöld fyrir förgun og hirðu á blönduðum og flokkuðum úrgangi innheimtast með fasteignagjöldum og á sömu gjalddögum.

9. gr.

*Viðurlög.*

Með brot á samþykkt þessari skal farið samkvæmt ákvæðum XIX. kafla laga nr. 7/1998, um hollustuhætti og mengunarvarnir, og 68. gr. laga nr. 55/2003, um meðhöndlun úrgangs.

10. gr.

*Gildistaka.*

Samþykkt þessi staðfestist samkvæmt 2. mgr. 8. gr. laga nr. 55/2003, um meðhöndlun úrgangs, sbr. 59. gr. laga nr. 7/1998, um hollustuhætti og mengunarvarnir. Samþykktin tekur þegar gildi. Frá sama tíma fellur úr gildi samþykkt nr. 247/2011, um meðhöndlun úrgangs í Fjarðabyggð.

*Umhverfis- og auðlindaráðuneytinu, 8. febrúar 2019.*

F. h. r.

**Sigurbjörg Sæmundsdóttir.**

\_\_\_\_\_  
*Steinunn Elna Eyjólfsdóttir.*